

明

會

要

明會要卷七十八

永新龍文彬纂

外蕃二

正南

安南

安南古南交地唐以前皆隸中國五代時爲土人曲承美竊據宋初封丁部領子璉爲交趾郡王三傳爲黎桓所篡尋又爲李公蘊所篡隆興二年封公蘊安南國王安南國名自此始李氏八傳無子傳其壻陳日煚其地東距海西接老撾南渡海卽占城北連廣西之思明南甯雲南之臨

安元江人性獷悍驩演二州多文學交愛二州多倜儻士
洪武二年王陳日燿遣使來朝貢方物帝喜賜宴命張以
甯牛諒往封爲安南國王賜駝紐塗金銀印

五年陳叔明弑其主日燿自立遣使入貢卻之叔明復朝
貢謝罪且請封帝命叔明姑以前王印視事

七年叔明乞命弟熾攝政從之熾遣使謝恩請貢期詔三
年一貢使者毋過三四人貢物無厚

二十一年遣使入貢帝以其頻煩且貢物侈命仍三歲一
貢毋進犀象

建文元年國相黎季犛弑其主大殺陳氏宗族而自立更

姓名爲胡一元名其子蒼曰胡奩謂出帝舜裔胡公後僭國號大虞年號元聖尋自稱太上皇傳位奩朝廷不知也永樂元年奩遣使奉表朝貢詭言陳氏嗣絕臣陳氏甥爲眾所推乞賜封爵帝遣使齎敕諭其陪臣耆老詢以陳氏繼嗣有無及推立誠僞奩隨遣使還奏遂詔封奩

二年安南舊臣裴伯耆詣闕告難未幾老撾送前國王日燿弟陳天平至請兵復讐奩方遣使賀正旦帝出天平示之皆錯愕下拜有泣者帝遣使詰責令具篡弑之實以聞奩復遣使謝罪請迎天平歸國帝信之三年冬遣都督僉事黃中呂毅將兵納天平於安南將至芹站奩伏兵邀殺

天平帝大怒決意討之

四年命征夷將軍張輔等大破之陳氏子孫耆老千餘詣軍門言陳氏已滅無可繼者安南本中國地乞仍入職方同內郡輔等以聞詔改安南爲交趾設交趾布政司領府十七州四十一縣一百五十七

大軍甫還復並起爲亂屢發兵征討皆敗沒宣宗卽位交趾黎利詭稱陳氏有後具書詣柳升軍乞罷兵立陳氏裔升不啟封遣使奏聞帝心知其詐欲藉此息兵乃遣使齎詔撫諭人民盡撤軍民北還

宣德六年命黎利權署安南國事利雖受敕命其居國稱

帝建東西二都署百官設學校以經義詩賦二科取士其制度多擬中國云

九年黎利死命其子麟權署國事正統元年封爲安南國王

天順元年遣使入貢乞賜袞冕如朝鮮例不從其使者乞以土物易書籍藥材從之

安南貢道故由廣西時雲南鎮守中官錢能貪恣遣指揮郭景齋敕取其貨王黎灝素欲窺雲南遂以解送廣西龍州罪人爲詞隨景假道雲南入京索夫六百餘且發兵繼其後雲南大擾詔守臣詰之輒詭詞對廟堂雖屢降敕諭

瀨益玩侮無畏忌

成化十七年使臣入貢請如暹羅瓜哇例賜冠帶許之不爲例

宏治三年占城王愬安南見侵兵部尙書馬文升召安南使臣曰歸諭爾王各保疆土享太平不然朝廷一旦赫然震怒天兵壓境如永樂朝事爾主得無悔乎安南自是有所畏

十年賜王黎暉皮弁服金犀帶使臣言國主受王封賜服與臣下無別乞改賜禮官言安南名爲王實中國臣也嗣王新立必賜皮弁冠服使不失主宰一國之尊又賜一品

冠服俾不忘臣事中國之義今所請紊亂祖制不可許
正德中陳暘殺國王黎暘而自立暘臣莫登庸起兵討暘
立暘兒子諱旋逐諱立其庶弟廕已復殺廕篡其位不通
朝貢者二十年

嘉靖十五年皇子生當頒詔安南禮官夏言言黎諱黎廕
均非黎暘應立之嫡莫登庸陳暘均彼國篡逆之臣宜暫
停使命遣官按問帝以安南叛逆昭然命言會兵部議征
討戶部侍郎唐胄力陳用兵七不可下兵部議會諱卒子
甯遣使告難乞興問罪師乃詔起右都御史毛伯溫於家
督軍討之兵部侍郎潘珍持不可廣東按臣余光言莫之

纂黎猶黎之篡陳不足深較但當罪其不庭責以稱臣修貢不必遠征以疲中國帝怒奪光俸

十八年仍遣伯溫等南征伯溫駐師近邊登庸遣使乞降盡籍國中土地軍民職官悉聽處分疏聞帝大喜詔改安南國爲安南都統使司授登庸都統使秩從二品銀印舊所僭擬制度悉除去改其十三道爲十三宣撫司各設宣撫同知副使僉事聽都統黜陟廣西歲給大統厯仍三歲一貢以爲常并令覈黎甯眞僞果黎氏後割所據四府奉其祀事否則已之至是而安南定

黎甯據清華自爲一國萬厯初莫氏漸衰黎氏後裔維潭

舉兵攻莫茂洽殺之卽叩關求通貢因詔維潭爲都統使而莫氏但保安平一郡勢益弱

暹羅

暹羅在占城正南卽隋唐赤土國後分羅斛與暹二國暹土瘠不宜稼羅斛地平衍種多穫暹仰給焉元時羅斛強併有暹地遂稱暹羅斛國

洪武四年其王參烈昭毘牙遣使奉表來貢

十年世子昭祿羣膺承其父命來朝帝喜賜之印文曰暹羅國王之印自是始稱暹羅比年一貢或一年兩貢正統後或數年一貢

永樂二年有番船飄至福建海岸詰之乃暹羅與琉球通
好者所司籍其貨以聞帝曰二國修好乃甚美事不幸遭
風正宜憐惜豈可因以爲利所司其治舟給粟俟風便遣
赴琉球

宏治十年入貢時四夷館無暹羅譯字官閣臣徐溥等請
移牒廣東訪取能通彼國言語文字者赴京備用從之
正德十年進金葉表朝貢館中無識其字者閣臣梁儲等
請選留其使一二人入館肄習報可

萬厯二十年日本破朝鮮暹羅請潛師直擣日本牽其後
中樞石星議從之兩廣督臣蕭彥持不可乃已其後奉貢

不替

彭亨

彭亨在暹羅之西洪武十一年其王麻哈刺惹答饒遣使齋表來朝貢方物宴賚如禮永樂九年王巴刺密瑣刺達羅息泥遣使入貢十二年十四年復入貢

占城

占城居南海中卽周越裳地洪武二年王阿答阿者遣使來朝時安南與占城構兵帝遣使諭解又命使齋詔封爲占城國王

三年遣使往祭其山川頒科舉詔於其國

四年占城入貢言安南侵擾因求兵器樂器樂人帝命禮部諭之曰占城安南同奉正朔乃擅自搆兵毒害生靈既失事君之禮又乖交鄰之道已咨安南國王令卽日罷兵王亦宜講信修睦各保疆土所請兵器於王何吝但兩國互搆而賜占城是助王相攻甚非撫安之義樂器樂人語音殊異難以發遣王其選擇習華音者以來當令肄習永樂元年王占巴的賴奉表朝貢且告安南侵掠請降敕戒諭帝可之

五年攻取安南所侵地獻俘闕下貢方物謝恩帝嘉其助兵討逆遣使齎敕幣賜之

正統元年瓊州知府程瑩言占城比年一貢勞費實多乞如暹羅諸國例三年一貢帝敕其使如瑩言然番人利中國互市雖有此令迄不遵

成化七年安南破占城據其地改爲交南州王弟槃羅茶悅逃山中遣使告難兵部言宜遣官齎敕諭還其國王及眷屬帝慮安南逆命令俟貢使至日賜敕責之

二十年冊封古來爲國王廷議遣大臣往勞檄安南存亡繼絕迎古來返占城帝命南京右都御史屠滸往至廣東傳檄安南宣示禍福募健卒二千人駕海舟二十艘護古來還國安南以滸大臣奉特遣不敢抗古來乃得入

宏治三年遣使謝恩其國自殘破後民物蕭條貢使漸稀
嘉靖二十二年貢使訴安南侵擾道阻難歸乞遣官護送
報可

滿刺加

滿刺加在占城南國有山出泉流爲溪土人淘沙取錫煎
成名曰斗錫田瘠少收民皆淘沙捕魚爲業

永樂元年遣中官尹慶使其地宣示威德及招徠意其酋
大喜遣使至京因封爲滿刺加國王賜誥印使者言王慕
義願同中國列郡歲效職貢請封其山爲一國之鎮帝從
之

九年王率其妻子陪臣來朝宴賚極厚嗣後或連歲或間歲入貢以爲常

十七年王率妻子陪臣來朝及辭歸訴暹羅見侵狀帝爲賜敕諭暹羅暹羅乃奉詔

宣德六年遣使者來言暹羅謀侵本國王令臣三人附蘇門答刺貢舟入愬帝命附鄭和舟歸國令和齎敕諭暹羅責以輯睦鄰封毋違朝命初三人至無貢物禮官言例不當賞帝曰遠人越數萬里來愬不平豈可無賜遂賜如例正統十年貢使請賜王護國敕書及蟒服繖蓋以鎮服國人從之

正德末佛郎機舉兵侵奪其地王出奔遣使告難世宗嗣位敕責佛郎機令還其故土諭暹羅諸國王以救災恤鄰之義迄無應者滿刺加竟爲所滅

阿魯

阿魯亦名啞魯近滿刺加永樂九年王速魯唐忽先遣使附古里諸國入貢

十七年王子段阿刺沙遣使入貢

十九年二十一年再入貢

瓜哇

瓜哇在占城西南洪武二年遣使以卽位詔諭其國三年

又以平定沙漠頒詔於其國其王昔里八達刺蒲遣使奉表來朝貢方物其國有東西二王東王勿院勞網結西王勿勞波務各遣使朝貢

永樂元年西王都馬板遣使入賀命賜以鍍金銀印西王遣使謝印貢方物而東王孛令達哈亦遣使朝貢請印命遣官賜之自後二王並貢

四年西王與東王構兵東王戰敗國被滅適朝使經東王地部卒入市西王國人殺之凡百七十人西王懼遣使謝罪帝賜敕切責之命輸黃金六萬兩以贖自後比年一貢或間歲一貢或一歲數貢

正統八年廣東參政張琰言瓜哇朝貢頻數供億費繁敝中國以事遠人非計帝納之其使還賜敕曰海外諸邦並三年一貢王亦宜體恤軍民一遵此制十一年復三貢後乃漸稀

眞臘

眞臘在占城南宋慶元中破占城而併其地改國名曰占臘元時仍稱眞臘

洪武三年遣使齎詔撫諭其國四年其國巴山王忽爾那遣使奉表朝貢

十六年遣使齎勘合文冊賜其王凡國中使至勘合不符

者卽屬矯僞許繫縛以聞其王遣使來貢

永樂二年王遣使朝貢初中國使眞臘有部卒三人潛遁索之不得王以其國三人代之至是引見帝曰華人自逃於彼何預而責償且語言不通風土不習吾焉用之命賜衣服及道里費遣還

永樂中貢使以其國數被占城侵擾久留不去帝遣中官送之還並敕占城王罷兵修好景泰後其使不常至

三佛齊

三佛齊與占城爲鄰其地爲諸番要會俗富好淫下稱其上曰詹卑猶國君也洪武三年遣使詔諭其國王遣使奉

金葉表隨入貢戶部言其貨舶至泉州宜徵稅命勿徵其國有三王先後來貢

九年王怛麻沙那阿者卒嗣子表貢請命命使臣齎印敕封爲三佛齊國王時瓜哇強已威服三佛齊而役屬之聞天朝封爲國王與已埒則大怒遣人誘朝使邀殺之天子亦不能問罪其國益衰貢使遂絕

三十年瓜哇據其國改名舊港亦不能盡有其地華人流寓者往往起而據之

淳泥

淳泥本閩婆屬國也洪武二年命張敬之沈秩往使其國

王既許三年後入貢閭婆人聞之王意中沮秩折之曰閭婆久稱臣奉貢爾畏閭婆不畏天朝耶乃遣使從敬之等入朝貢方物帝喜宴賚甚厚

八年命其國山川附祀福建山川之次

永樂三年詔封淳泥國王賜印符誥命

六年王率妃及弟妹子女陪臣凡百五十餘人來朝貢珍物賜宴奉天門妃以下饗於他所悉賜冠帶襲衣王乞封其國之後山爲一方鎮乃封爲長甯鎮國之山御製碑文賜之

十年嗣王遐旺復偕其母來朝宴賚如前

自十三年至洪熙元年四入貢嗣後貢使雖稀而商人來往不絕

巴喇西

巴喇西在南海去中國絕遠正德六年遣使臣來朝進金葉表貢祖母綠珊瑚樹等物帝嘉其遠來賜宴有加

西南

蘇門答刺

須文達那附

蘇門答刺在滿刺加之西國俗頗淳惟王好殺殺人輒取血浴身謂可除疾四方商賈輻輳華人往者以地遠價高獲利倍他國

成祖初遣使以卽位詔諭其國永樂二年命使齎賜招徠
明年其酋宰奴里阿必丁已遣使入朝貢方物詔封爲蘇
門答刺國王賜印誥時王與鄰國花面王戰中矢死子弱
不能復仇其妻號於眾曰能爲我報仇者我以爲夫與共
國事有漁翁聞之率眾殺花面王其妻遂從之稱爲老王
旣而王子年長率部眾殺老王而自立老王弟蘇幹刺逃
山中連年率眾侵擾王子遣使來訴十三年命中官鄭和
率兵往捕蘇幹刺歸獻闕下國乃甯其王遣使入謝
宣德元年遣使入賀六年遣使入貢者再八年貢麒麟
成化二十二年其使者至廣東有司驗無印信勘合乃藏

其表於庫卻還其使別遣番人輸貢物京師稍有給賜自後貢使不至

洪武十六年有須文達那國王殊旦麻勒兀達盼遣使來朝貢馬布兜羅棉等物及薔薇水沈速諸香賜王大統麻綺鈔使臣襲衣或言須文達那卽蘇門答刺洪武時所更然其貢物與王之名皆不同無可考

覽邦

覽邦在西南海中其地多沙磧麻麥之外無他種商賈鮮至洪武九年王昔里馬哈刺札的刺札遣使奉表來貢宴賜如制

永樂宣德中嘗附鄰國朝貢

淡巴

淡巴在西南海中洪武十年王佛喝思羅遣使上表貢方物賜賚有差其國石城瓦屋王乘輿官跨馬有中國威儀男女勤於耕織市有貿易野無寇盜稱樂土焉

百花

百花在西南海中多奇花異卉故名百花洪武十一年王刺丁刺者望沙遣使奉金葉表貢方物賜賚有差

那孤兒

那孤兒在蘇門答刺之西地狹止千餘家男子皆以墨刺

面爲花獸之狀故又名花面國永樂中鄭和使其國其酋長常入貢方物

黎伐

黎伐在那孤兒之西南大山北大海西接南渤利隸蘇門答刺聲音風俗多與之同永樂中常隨其使臣入貢

南渤利

南渤利與蘇門答刺相近王及居民皆回回人地少穀人多食魚蝦西北海中有山甚高大曰帽山山西大海名那沒黎洋西來洋船俱望此山爲準近山淺水內生珊瑚樹高者三尺許

永樂十年王馬哈麻沙附蘇門答刺使臣入貢賜印誥終
成祖時比年入貢

宣德五年使鄭和遍賜諸國南渤利亦與焉

柯枝

柯枝或言卽古槃槃國王崇釋教佛座四旁皆水溝復穿
一井每旦鳴鐘鼓汲水灌佛三浴之始羅拜而退人分五
等一曰南昆王族類二曰回回三曰哲地皆富民四曰革
全皆牙儉五曰木瓜木瓜最貧爲人執賤役者途遇南昆
哲地人輒伏地俟其過乃起

永樂元年遣使齎詔撫諭其國王遣使入朝貢方物

九年王可亦里遣使入貢請賜印誥封其國中之山
十年遣鄭和齎印賜王並撰碑文命勒石山上自後閒歲
入貢

小葛蘭

小葛蘭與柯枝接西洋小國也俗瀋土薄收穫少仰給榜
葛刺永樂五年遣使附古里蘇門答刺入貢賜賚如制

錫蘭山

錫蘭山或言卽古狼牙修東南海中有山三四座總名曰
翠藍嶼中一山尤高大番名梭篤蠻山相傳釋迦佛昔經
此山浴於水或竊其袈裟服誓云後有穿衣者必爛其皮

肉自是寸布挂身輒發瘡故男女皆裸體但紉木葉蔽其前後或圍以布故又名裸形國王崇釋教重牛日取牛糞燒灰塗其體又調以水徧塗地上乃禮佛手足直舒腹貼於地以爲敬王及庶民皆如之

永樂六年鄭和使西洋過其地王亞烈苦奈兒欲害和和覺去之他國及歸王發兵劫和塞歸路和由閒道乘虛攻拔其城生擒王及妻子頭目獻俘於朝釋之命擇其族之賢者立之有邪把乃那者諸俘囚咸稱其賢乃遣使齎印誥封爲王遂屢入貢

宣德正統天順閒數遣使來貢自後不復至

朵甘

朱甘在四川徼外唐吐蕃地南與烏斯藏鄰洪武初遣使招撫遂來朝宴賚遣還繼改爲行都指揮使司並賜銀印復增置宣慰司招討司萬戶千戶等官自是修貢唯謹永樂十八年帝以番俗惟僧言是聽乃寵以國師諸美號賜誥印令歲朝由是諸番僧來者多迄宣德朝禮之益厚正統初諸番相率朝貢者八百二十九寨悉賜賚遣歸天順四年四川三司言比奉敕書番僧朝貢入京者不得過十人餘留境上候賞今蜀地災傷若悉留之動經數月有司困於供億宜如正統間制宴待遣還報可成化六年

申諸番三歲入貢之例於是貢使漸稀

長河西魚通甯遠

長河西魚通甯遠在四川徼外地通烏斯藏洪武時長河土官遣使來貢方物宴賚遣還

三十年置長河西魚通甯遠宣慰司以其酋爲宣慰使自是修貢不絕初魚通及甯遠長河西本各爲部至是始合爲一

永樂十三年貢使言西番無他產惟以馬易茶近年禁約生理實艱乞仍許開市從之

成化四年申諸番三歲入貢之例惟長河西仍比歲一貢

六年頒定二年或三年一貢之例貢使不得過百人
十七年禮官言烏斯藏諸番王例三歲一貢彼以道險來
少而長河西番僧往往詐爲諸王文牒入貢冒賞請給諸
番王及長河西董卜韓胡敕書勘合邊臣審驗方許進入
或道阻不許補貢從之

二十二年禮官言長河西以黎州大渡河寇發連歲失貢
至是補進三貢定制道梗者不得再補但今貢物已至宜
順其情納之而量減賜資報可

宏治十二年禮官言長河西及烏斯藏一時並貢使者至
二千八百餘人乞諭守臣無濫送報可

嘉靖二年定令不得過一千人隆慶三年定五百人全賞遣八人赴京之制

董卜韓胡

董卜韓胡在四川威州之西永樂九年酋長南葛遣使奉表入朝貢方物置宣慰司

正統十三年四川巡按張洪等奏言雜谷內聯威州保縣外鄰董卜韓胡雜谷力弱欲抗董卜實倚重於威保董卜勢強欲通威保卻受阻於雜谷以此仇殺素不相能銅門及日駐諸寨乃雜谷威保要害地董卜欺雜谷妻寡子弱瞰我軍遠征麓川假進貢之名欲開通道路意在吞滅雜

明倫彙編 家範典 卷一百一十六
谷構陷唐秦所請不可許

景泰三年朝議獎其入貢勤誠進秩都指揮使尋饋四川巡撫李匡銀甕金珀求御製大誥周易尙書毛詩小學方輿勝覽成都記諸書匡聞之於朝因言唐時吐蕃求毛詩春秋於休烈謂予之以書使知權謀愈生變詐非中國之利裴光廷謂吐蕃久叛新服因其有請賜以詩書俾漸陶聲教休烈徒知書有權略變詐不知忠信禮義皆從書出明皇從之今茲所求臣以爲予之便惟方輿勝覽成都記形勝關塞所具不可概予帝如其言

成化五年四川三司奏言雜谷與董卜構兵維州諸地俱

爲侵奪貢道阻絕今雜谷恢復故疆將遣使來貢不知貢
期未敢擅遣帝從禮官言許以三年爲期惟董卜許比年
一貢

嘉靖二年定令貢使不得過千人隆慶二年董卜及別思
寨貢使多至千七百餘人命予半賞遣八人赴京爲定制

烏斯藏大寶法王

烏斯藏在四川西南徼外其地多僧洪武初遣使招諭攝
帝師納木扎勒巴藏布舊作喃加巴藏卜先遣使朝貢六年自入

朝七年遣使來朝請封號賜以玉印

永樂元年遣使往徵其僧哈里馬

舊作哈立麻

入朝封爲大寶

法王賜予優厚六年辭歸自是迄正統末入貢者八法王卒久不奉貢

宏治八年遣使來貢十二年兩貢禮官以一歲再貢非制請裁其賜資從之

正德十年來貢時帝惑近習言謂烏斯藏有活佛能知三世帝欣然欲見之考永宣間陳誠侯顯入番故事命中官劉允乘傳往迎閣臣梁儲等言祖宗朝雖嘗遣使西番蓋因天下初定藉以化導愚頑鎮撫荒服非信其教而崇奉之也承平之後止因其來朝厚加賞賚未嘗輕辱命使遠涉其地今忽遣近侍往送幢幡朝野聞之莫不駭愕而允

奏乞鹽引至數萬動撥快馬船至百艘又許其便宜處置
錢物勢必攜帶私鹽騷擾郵傳爲官民患況自天全六番
出境涉數萬之程道途絕無郵置人馬安從供頓脫中途
遇寇何以禦之虧中國之體納外番之侮無一可者所齎
敕書臣等不敢撰擬帝不聽及允入其地番僧恐中國誘
害之匿不出見將士忽欲脅以威番人夜襲之奪寶貨器
械以去將校死者二人卒數百人傷者半之允乘善馬疾
走僅免

嘉靖中法王猶數入貢迄神宗朝不絕時有自稱活佛者
求通貢許之此僧有異術卽大寶法王及闡化諸王皆奉

之諸番王徒擁虛位而已

大乘法王

大乘法王亦烏斯藏僧永樂十年來朝受封禮之亞於大寶法王洪熙宣德間並來貢

成化四年其王旺布

舊作完卜

遣使來貢禮官言無法王印文

且從洮州入非制宜減其賜物使者言所居去烏斯藏二十餘程涉五年方達京師且所進馬多乞給全賜乃命量增

宏治元年其王桑節幹

舊作桑加瓦

遣使來貢故事法王卒其

徒自相繼承不由朝命三年輔教王遣使奉貢奏舉大乘

法王襲職帝但納其貢賜賚遣還不命襲職

正德十年遣使來貢請襲封禮官失於稽考竟許之

嘉靖十五年偕輔教聞教諸王來貢使者至四千餘人帝以人數踰額減其賞並治三司官濫送之罪嗣後奉貢不絕

大慈法王

大慈法王亦烏斯藏僧永樂十二年入朝禮亞大乘法王賜之印誥

宣德九年入朝封大慈法王

英宗嗣位禮官奏汰番僧六百九十人命大慈法王及西

天佛子如故餘遣還

永樂中自闡化等五王及二法王外授西天佛子者二灌
頂大國師者九灌頂國師者十有八其徒禪師僧官不可
悉數其徒交錯於道外擾郵傳內耗大官公私騷然帝不
恤也英宗初雖多遣斥其後加封號者亦不少世宗初汰
番僧法王以下悉被斥

闡化王

闡化王亦烏斯藏僧洪武五年封僧嘉木楊沙克嘉舊作章陽
加沙爲灌頂國師以撫諭朵甘諸部明年其僧遣酋奉表入
貢自是三年一貢

永樂二年遣使入貢四年封爲闡化王

十一年命中官楊三保復使其地令與贊善輔教闡教三王共修驛站自是道路畢通其後入貢益頻數特遣賜之綵幣

宣德九年貢使歸以賜物易茶至臨洮有司沒入之羈其使請命詔釋之還其茶

成化元年禮部言宣正間諸貢不過三四十人景泰時十倍天順間百倍今貢使方至乞敕諭闡化王令如洪武舊制三年一貢從之

二十一年遣使四百六十人來貢守臣遵新例但納其一

百五十人禮官以使者已入境難固拒請順其情概納之
爲後日兩貢之數從之

嘉靖三年偕輔教王及大小三十六番請入貢禮官以諸
番不具地名族氏令守臣覈實以聞

隆慶三年再定令闡化聞教輔教三王俱三歲入貢貢使
各千人半全賞半減賞全賞者遣八人赴京餘留邊上遂
爲定制後遂奉貢不替

贊善王

贊善王者靈藏僧也其地在四川徼外視烏斯藏稍近永
樂四年其僧珠卜巴勒舊作著思巴兒遣使入貢命爲灌頂國師

明年封贊善王賜印誥

自永樂迄正統貢無定期成化元年始定三歲入貢之制
五年四川都司言贊善諸王不遵定制遣使率各寺番僧
百三十二種入貢且無番王印文今止留十餘人守貢物
餘已遣還禮官言番地廣遠番王亦多若遵例並時入貢
則內郡疲供億若令諸王於應貢之歲各具印文取次而
來今貢使已至難拂其情乞許作明年應貢之數報可
十八年禮官言番王三歲入貢貢使百五十人定制也近
贊善王連貢者再已遣四百十三人今因請封請襲又遣
千五百五十人違制宜卻乞許其請封襲者而以三百人

爲後來兩貢之數餘悉遣還從之

護教王

護教王者納木喀巴勒藏布袞確克僧也舊作南哥巴藏卜僧覺僧永

樂四年遣使入貢授灌頂國師明年遣使入謝封護教王賜印誥遂頻歲入貢洪熙宣德中並入貢後無嗣僧遂絕

闡教王

闡教王者巴勒恭噶僧也舊作必力工瓦僧永樂元年其國師端

珠卜舊作端竹宴賚遣還

四年又貢十一年加號大國師又封其僧琳沁巴勒濟特

舊作領眞巴兒吉爲闡教王賜印誥綵幣

後比年一貢迄嘉靖時修貢不替

輔教王

輔教王者思達克藏僧也地遠於烏斯藏永樂十一年封其僧納木喀埒克巴舊作南渴烈思巴爲輔教王通貢使賜予與

諸法王等

宏治十二年輔教等四王及長河西宣慰司並時入貢嗣後奉貢不絕

西天阿難功德國

西天阿難功德國西方番國也洪武七年王卜哈魯遣其講主來朝貢方物賜文綺及布帛諸物後不復至

又和林國師多爾濟辰數錫喇卜藏布舊作朶兒只怯烈失思巴藏卜亦遣其講主獻銅佛舍利及元所授玉印圖書等命宴賚遣還明年國師入貢和林非西番其國師則番僧與功德國同時來貢後亦不復至

尼八刺國 地湧塔國

尼八刺國在諸藏之西其王皆僧也洪武十七年命僧智光往其國並使其鄰境地湧塔國王馬達納羅摩遣使入朝貢金塔等方物賜以誥敕綵幣

二十三年再貢終太祖時數歲一貢

永樂七年遣使來貢以銀幣賜其嗣王沙葛新的及地湧

塔王可般

明年來貢封爲尼八刺國王賜印誥

十六年來貢命使往報之所經罕東靈藏巴勒恭噶

舊作必力

耳烏斯藏及野藍卜納皆有賜

宣德二年又遣使賜其王與地湧塔王自後貢使不復至

明會要卷七十八終

明會要卷七十九

永新龍文彬纂

外蕃三

正西

沙州衛

沙州本漢敦煌郡距玉門陽關不遠永樂二年酋長昆濟

楞

舊作因

邁珠

舊作佳

率眾來歸命置沙州衛授二人指揮

使賜印誥

英宗初昆濟楞屢爲哈密所侵且懼衛喇特見逼率其屬二百餘人走塞下陳飢窘狀詔邊臣發粟濟之令議所處

置邊臣請移之苦峪從之自是不復還沙州但遙領其眾而已

正統四年部眾百三十餘家亡入哈密赤斤亦納其叛人而罕東久駐牧沙州不去昆濟楞屢訴於朝朝廷數敕責諸部多不奉命

九年昆濟楞卒長子訥格

舊作喃哥

率其弟恭羅凌戩

舊作克俄羅領

占來朝授訥格都督僉事其弟都指揮使旣還兄弟乖爭部眾攜貳甘肅鎮將任禮收其全部入塞居甘州沙州遂空先是太宗於西北邊置哈密沙州赤斤罕東四衛於嘉峪關外屏蔽西陲至是沙州先廢而諸衛亦漸不能自立

肅州遂多事

赤斤蒙古衛

赤斤蒙古漢敦煌郡地永樂二年塔爾尼

舊作塔力尼

率所部

來歸詔設赤斤蒙古所以塔爾尼爲千戶賜印誥

八年回回哈刺馬牙叛於肅州約塔爾尼爲援拒不應而率部下禽賊六人以獻天子聞之喜詔改千戶所爲衛擢塔爾尼指揮僉司尋進秩指揮同知明年遣使貢馬

景泰二年額森遣使持書求婚赤斤以其書來上兵部尙書于謙言赤斤諸衛久爲我藩籬額森無故招降結親意在撤我屏蔽宜令邊臣整兵慎防并敕阿速悉力捍禦有

警馳報發兵應援從之

成化十九年鄰番默克埒

舊作野也克力

來侵大肆殺掠赤斤遂

殘破其酋長訴於邊臣給之粟又命繕治其城令流移者復業赤斤自是不振

正德中土魯番犯肅州赤斤當其衝益遭蹂躪乃徙部眾於肅州其城遂空

罕東衛

罕東在赤斤蒙古南嘉峪關西南洪武三十年酋索諾穆濟喇斯

舊作鎮南吉刺思

遣使入貢詔置罕東衛授指揮僉事永

樂後數入貢

正統四年罕東安定合眾侵西番申藏族掠其馬牛雜畜以萬計其僧訴於邊將言畜產一空歲辦差發馬無從出帝切責二衛數其殘忍暴橫違國法毒鄰境之罪令悉歸所掠又諭僧不限舊制隨所有入貢

成化九年土魯番陷哈密都督李文西征罕東以兵來助後都督哈商舊作罕慎復哈密亦藉其兵賜敕獎賚

正德中蒙古大酋入青海罕東亦遭蹂躪其眾益衰後土魯番犯肅州遂棄城內徙

罕東部人安扎

舊作奄章

與種類不相能率其眾逃居沙州境

部落日蕃宣德七年命其子班麻思結爲指揮使然猶居

沙州不還本衛成化中部眾益盛奏請自爲一衛兵部言
近土魯番吞噬哈密罕東諸衛各不自保西鄙爲之不甯
而赤斤罕東苦峪又各懷嫌隙不相救援倘沙州更無人
統理勢必爲強敵所併邊方愈多事宜如所請卽於沙州
故城置罕東左衛從之

正德四年左衛只克部內有劫掠鄰境者守臣將勦之兵
部言西戎强悍漢唐以來不能制我朝建哈密赤斤罕東
諸衛授官賜敕犬牙相制不惟斷匈奴右臂亦以壯西土
藩籬今番人相攻於我何預而遽欲兵之宜敕都督只克
曉諭諸族悔過息兵報可

正德十一年土魯番以兵脅之左衛不克自立相率徙肅州

安定衛

安定本名薩里輝和爾

舊作撒里畏兀兒

東近罕東北邇沙州南

接西番洪武七年遣使朝貢

太祖遣官厚賚其王而分其地爲阿端阿眞若先帖里四部各錫以印明年遣使來貢請置安定阿端二衛從之乃封卜烟特穆爾爲安定王

十年王爲其部沙喇

舊作沙刺

所弑王子巴勒桑實哩

舊作板咱失里

復仇誅沙喇尋又爲沙喇部將所殺其眾遂衰

二十九年復立安定衛授其酋官以安部眾

永樂間安定王孫雅布丹

舊作亦攀丹

來朝自陳家難詔仍令

襲爵賜印誥自是朝貢不輟

正德時蒙古繼掠鄰境安定部眾從此散亡

阿端衛

阿端在薩里輝和爾之地洪武八年置衛後爲多爾濟巴

勒

舊作朵兒只巴

所破其衛遂廢

永樂間酋長小薛呼爾察

舊作忽魯扎

來朝請復置衛卽授爲

指揮僉事

洪熙時察遜

舊作曲先

酋織濟斯

舊作散卽思

脅阿端指揮蘇爾丹

舊作鎖魯丹

邀劫朝使蘇爾丹懼而遠竄

宣德中其子珠扎干

舊作眞只罕

仍依察遜雜處西甯都督史

昭言珠扎干本別一部因其父助繖濟斯爲逆竄處察遜其地當烏斯藏孔道恐復爲亂宜討之帝敕昭曰殘寇窮迫無地自容宜遣人宥其罪令復故業於是珠扎干復率所部還居本土迄正統朝數入貢後不知所終

察遜衛

舊作曲先

察遜在肅州西南漢西羌唐吐蕃地洪武時酋長入貢命設察遜衛官其人爲指揮後遭多爾濟巴勒

舊作朵兒只巴

之亂

部眾竄亡併入安定衛居阿眞之地

永樂初仍分爲二衛復先朝舊制察遜自是屢入貢

正德七年蒙古酋阿爾扎蘇

舊作阿爾禿廝

額布勒

舊作亦

竄居

青海察遜爲所蹂躪部族竄徙其衛遂亡

哈瑪爾

舊作哈梅里

哈瑪爾地近甘肅元諸王烏納實哩

舊作兀納失里

居之洪武十

三年濮英請略地開哈瑪爾之路烏納實哩懼遣使來朝
貢

二十四年遣使請於延安綏德平涼甯夏以馬互市帝曰
番人黠而多詐互市之求安知非覘我中國利其馬而不
虞其害所喪必多宜勿聽

時西域來貢者多爲哈瑪爾所遏有從他道來者又遣兵邀殺之帝聞之怒命都督僉事劉真偕宋晟督兵討之真等由涼州西出乘夜直抵城下四面圍之烏納實哩突圍而出率家屬遁去真等攻破其城二十五年遣使貢馬騾請罪帝納之

羅密

舊作魯迷

羅密去中國極遠嘉靖三年遣使貢獅子西牛給事中鄭一鵬言羅密非常貢之邦獅子非可育之獸請卻之禮官席書等言羅密不列王會其真僞不可知近土魯番數侵甘肅而邊吏於羅密冊內察有土魯番之人其狡詐明甚

明倫彙編 卷一百一十九
請遣之出關治所獲問諜罪帝竟納之而令邊臣察治
五年冬復以二物來貢旣頒賜其使臣言長途跋涉費至
二萬二千餘金請加賜御史張祿言返其人卻其物薄其
賞明中國聖人不貴異物之意不納乃從禮官言如宏治
賽瑪爾堪例益之

二十二年偕天方諸國貢馬及方物二十七年三十三年
並入貢

坤城

坤城西域回回種宣德五年使臣來朝貢駝馬時有開中
之令使者輸米一萬六千七百石於京倉中鹽及辭還願

以所納米獻官帝曰回人善營利雖名朝貢實圖貿易可
酬以直於是予帛四十匹布倍之其後亦常貢

自成祖威制萬方西域諸國無不稽顙稱臣宣德正統間
猶多重譯而至然仁宗不務遠略撤西洋取寶之船停松
花江造舟之役召西域使臣還京不欲疲中土以奉遠人
宣德繼之雖間一遣使尋亦停止以故邊隅獲休息焉

阿蘇

舊作
阿速

阿蘇與天方相近永樂十七年其酋遣使貢馬及方物宴
賚如制以地遠不能常貢天順七年命都指揮白全等使
其國後不復再貢

天方

按海國圖志阿丹默德那皆天方也而明史分三傳蓋方其盛時皆并於天方其後分爲數國

而教仍一教

天方古筠冲地亦名天堂又曰默伽宣德七年國王遣臣沙璣貢方物賜賚有加

宏治三年遣使偕賽瑪爾堪土魯番貢馬駝玉石

嘉靖四年遣使貢馬駝方物禮官言西人來貢陝西行都司稽留半年以上始爲具奏所進玉石悉麤惡而使臣所私貨皆良乞下按臣廉問自今毋得多攜玉石煩擾道途其貢不堪者治都司官罪從之

十一年禮官請敕督撫諸臣遇諸番人入貢分別存留起

送不得概遣入京帝可其奏後五六年一貢迄萬厯中不絕

默德訥

舊作默德那

默德訥回回祖國也地近天方宣德間其酋長遣使偕天

方使臣來貢後不復至相傳其初國王瑪哈穆特

舊作謨罕慕德

生而神靈盡臣服西域諸國諸國尊爲巴延鄂拉

舊作別諸扶爾

猶華言天使也其教以事天爲主每日西向虔拜每歲齋

戒一月隋開皇中始傳其教入中國迄元世其人徧於四

方皆守教不替俗重殺不食猪肉嘗以白布蒙頭雖適他

邦亦不易其俗

阿丹

阿丹在古里之西永樂中遣使奉表貢方物凡四至宣德五年命鄭和齎敕宣諭八年復入貢自後不復至梁隋唐時並有丹丹國或言卽其地王及國人奉回回教歲不置閏定時之法以月爲準如今夜見新月明日卽爲月朔四季不定自有陰陽家推算其日爲春首卽有花開其日爲秋初卽有葉落及日月交食風雨潮汐皆能預測其王甚尊中國聞鄭和船至躬率部領來迎入國宣詔訖遍諭其下盡出珍寶互易

榜葛喇

榜葛喇在西海中卽漢身毒國爲五印度之一卽東印度也永樂六年遣使朝貢七年再至攜從者二百三十餘人帝方招徠絕域頒賜甚厚自是比年入貢

十二年遣使貢麒麟及名馬方物禮官請表賀不許

正統三年又貢麒麟百官表賀其王敬天朝聞使者至遣官具儀物以千騎來迎其王拜迎詔叩頭手加額宴朝使不飲酒以薔薇露和香蜜水飲之

沼納樸兒

迪里附

沼納樸兒在榜葛喇西或言卽中印度古所稱佛國也永樂十年遣使者齎敕撫諭其國賜王額布勒

舊作亦不刺

金絨

錦金織文綺綵帛等物

十八年榜葛喇使者訴其國王數舉兵侵擾詔中官侯顯齋敕諭以睦鄰保境之義因賜之綵幣然其王以去中國絕遠朝貢不至

迪里國近沼納樸兒永樂十年遣使招諭賜賚之

忽魯謨斯

忽魯謨斯西洋大國也居西海之極自東南諸蠻邦及大西洋商船西域賈人皆來貿易故寶物填溢市列塵肆百物具備惟禁酒犯者罪至死書用回回字王及臣下皆遵回教婚喪悉用其禮

永樂十二年遣陪臣奉金葉表貢馬及方物自是凡四貢
鄭和亦再使至其國宣德八年貢使至正統元年附瓜哇
舟還國嗣後遂絕

溜山

溜山在西海中有石門如城闕山下有八溜或言外更有
三千溜船或失風入其處卽沈溺

永樂十年鄭和使其國十四年其王遣使來貢自後三貢
並與忽魯謨斯諸國偕宣德五年鄭和使其國後不復至

西洋古里

西洋古里地最大與僧迦密邇諸番要會也去中國甚遠

西瀕大海永樂三年遣使朝貢封爲國王賜印誥文綺遂
比年入貢是時諸番使臣充斥於庭以古里大國序其使
者於首嗣是屢偕諸國入貢國中半崇回教建禮拜寺數
十處七日一禮王老不傳子而傳甥無甥則傳弟無弟則
傳於國之有德者國事皆決於二將領以回回人爲之

西洋瑣里

瑣里附

西洋瑣里洪武二年命使臣劉叔勉以卽位詔諭其國三
年平定沙漠復遣使臣頒詔其王別里提遣使奉金葉表
獻方物賜文綺紗羅諸物甚厚

永樂間復遣使偕古里阿丹等十五國來貢

瑣里國近西洋瑣里而差小洪武三年命使臣齊詔撫諭其國五年王卜納的遣使朝貢並獻其國土地山川圖帝顧中書省臣曰西洋諸國素稱遠蕃涉海而來難計歲月其朝貢無論疏數厚往薄來可也乃厚賜如西洋瑣里

意大里亞

意大里亞國居大西洋中自古不通中國萬厯時其國人利瑪竇至京師爲萬國全圖言天下有五大洲第一曰亞細亞洲中凡百餘國而中國居其一第二曰歐羅巴洲中凡七十餘國而意大里亞居其一第三曰利末亞洲亦百餘國第四曰亞墨利加洲地更大以境土相連分爲南北

二洲最後得墨瓦臘泥加洲爲第五其說荒渺莫考初利瑪竇至以其方物進獻自稱大西洋人禮部言會典止有西洋瑣里國無大西洋其真僞不可知但諸番朝貢例有回賜乞給賜冠帶還國勿令潛居兩京與中人交往別生事端不報已而帝嘉其遠來假館授餐給賜優厚利瑪竇遂留不去後來者益衆有王豐肅者居南京專以天主教惑衆禮部郎中徐如珂惡之倡議驅斥與侍郎沈淮給事中晏文輝等合疏斥其邪說惑衆乞急行驅逐帝納其言令豐肅及龐迪我等俱遣赴廣東聽還本國命下久之遷延不行豐肅尋變姓名復入南京行教如故朝士莫能察

也

拂菻

拂菻在西海中卽漢大秦國元末其國人尼古爾

舊作担古倫

入市中國元亡不能歸洪武四年太祖召見命齋詔書還
諭其王復命使臣布拉舊作普刺齋書敕綵幣招諭之乃遣使
入貢後不復至

明會要卷七十九終

明會要卷八十

永新龍文彬纂

外蕃四

正西

哈密衛

哈密本漢伊吾盧地在燉煌北大磧之外爲西北往來要

路元末以威武王納固爾

舊作納忽里

鎮之尋改爲肅王卒永

樂二年其地恩克特穆爾

舊作安克帖木兒

嗣職遣使入貢封爲

忠順王尋設哈密衛以其頭目爲指揮千百戶等官

九年封推勒特穆爾

舊作免力帖木兒

爲忠義王賜印誥世守哈

密自是修貢唯謹

正統初封達幹實哩

舊作倒瓦答失里

爲忠順王五年遣使三貢

廷議以爲煩乃令三年一貢王爲衛喇特

舊作瓦剌酋額森

舊作

也先所脅服外順朝命實懼額森不能自振

景泰三年遣使朝貢請授官先是使臣至京必加恩命是時于謙掌中樞言哈密世受國恩乃敢交通額森今雖納款心猶譎詐若加官秩賞出無名乃止

成化五年與額森土魯番遣使三百餘人來貢邊臣以聞廷議貢有定期今前使未回後使又至且額森強寇今乃與哈密偕非哈密挾其勢以要利卽額森假其事以窺邊

帝乃卻其獻令邊臣宴賚遣還

十年命故王子哈商

舊作罕慎

權主國事時土魯番久據哈密

哈商寄居苦峪至十八年糾罕東赤斤二衛夜襲哈密城破之乘勢連復八城還居故土

宏治元年封哈商爲忠順王土魯番復誘殺哈商盡奪其地

嘉靖七年土魯番將伊蘭

舊作牙蘭

獲罪其主率所部二千人

降邊臣處之內地哈商子莽蘇爾

舊作滿速兒

怒遂引衛喇特

犯肅州爲遊擊彭濬所敗乃遁走復因赤斤使人持番文求貢詞多悖謾王瓊言番人且悔宜原情赦罪罷兵息民

胡世甯上言番酋變詐多端方許之朝貢而寇騎已至閉關與通貢利害較然瓊等旣言寇薄我城堡縛我士卒聲言大舉以恐喝天朝而又言番方懼禍宜仍許通貢何自相牴牾伊蘭本我屬番爲彼掠去束身來歸事屬反正宜卽撫而用之招彼攜貳益我藩籬至哈密三立三絕其王已爲番酋所困民盡流亡借使更立他族彼強則入寇弱則從番難保爲不侵不叛之臣故臣以爲立之無益宜謝絕哈密專守河西圖自強之策帝深善其言而張璁等皆主瓊議遂從之自是置哈密不問而其地遂爲土魯番所有迄隆慶後猶有入貢者然非忠順王苗裔矣

土魯番

土魯番卽古高昌在哈密西八百里永樂十三年吏部員外郎陳誠使西域土魯番遣使隨入貢授都督都指揮等官

洪熙元年其酋音濟徹爾

舊作尹吉察兒

躬率部落來朝宣德元

年如之還國病卒三年其子滿哥特穆爾來朝

初其地介諸部閒甚微弱後火州柳城皆爲所併國日強其酋也密力火者僭稱王以景泰三年入貢天順三年復貢使臣進秩者二十有四人

成化元年禮官定議土魯番三年一貢或五年一貢貢不

得過十人

五年遣使來貢其酋阿爾

舊作阿力

自稱蘇勒坦

舊作速檀

時哈密

以無主削弱九年春阿爾襲破其城執王母奪金印分兵守之而去嗣屢賜敕諭阿爾獻還哈密城印阿爾頻遣使入貢而不還哈密

十四年阿爾死其子阿哈瑪特

舊作黑麻

嗣爲速檀十八年

躬至哈密城下誘哈商盟執殺之復據其城而遣使入貢
宏治三年土魯番貢使還命內官張芾護行劉吉等言阿哈瑪特負天恩殺我所立哈商宜遣大將直搗巢穴滅其種類始足雪中國之憤卽不然亦當如古帝王封玉門關

絕其貢使猶不失大體今寵其使臣厚加優待又遣中使伴送非所以折其叛逆之心也況阿哈瑪特聚集人馬謀犯肅州名雖奉貢意實叵測請令兵部議羈其使臣疏入帝止蒞行

四年秋遣使再貢獅子願還金印及所據十一城邊臣以聞許之果以城印來歸明年封陝巴爲忠順王

六年帝數召土魯番貢使入見耿裕等言朝廷馭外番宜惜大體番使自去年入都久不宣召今三月以來宣召至再賜幣帛羊酒正當謾書投入之時小人何知將謂朝廷恩禮視昔有加乃畏我而然事干國體不可不慎帝卽遣

其使還閉嘉峪關永絕貢道其鄰邦不獲貢胥怨阿哈瑪特十年冬送還陝巴款關求貢廷議許之

嘉靖中伊蘭旣降莽蘇爾失其所倚賴勢亦漸孤部下各自雄長稱王入貢者多至十五人後定令五歲一貢貢期如令而來使益多迄萬厯朝奉貢不絕

火州

火州地多山青紅若火故名東距哈密西連伊里巴拉南抵于闐北接衛拉特地在嘉峪關外永樂五年其酋遣使入貢使臣言回回行賈京師者甘涼軍士多私送出境洩漏邊務帝命御史往按且敕總兵官嚴束之

十一年遣使來貢命陳誠李暹等以璽書文綺往勞十三年遣使隨誠來貢正統十三年復貢後遂絕

柳城

柳城一名魯陳在火州城東七十里永樂中常遣使入貢宣德五年正統五年十三年並入貢自後不復至

凡中朝遣使及其酋長入貢多與火州及土魯番偕後土魯番強柳城及火州並爲所滅

衛喇特

舊作瓦剌

衛喇特蒙古部落也在韃靼之西土魯番之地元亡其強

臣蒙克特穆爾

舊作猛可帖木兒

據之死眾分爲三其渠曰瑪哈

穆特

舊作馬哈木

曰太平曰巴圖博囉

舊作巴禿孛羅

永樂六年瑪哈穆特等遣諾觀達什

舊作答失

來貢馬明年

封瑪哈穆特爲順甯王太平爲賢義王巴圖博囉爲安樂

王賜以印誥自是歲一入貢

後衛喇特漸驕十一年擁兵將入犯帝乃親征破其眾於

和拉和錫袞

舊作忽蘭忽失溫

追至圖拉河

舊作土刺河

而還瑪哈穆

特等遁

十二年瑪哈穆特等貢馬謝罪且還前所留使詞卑帝曰

衛拉特不足較受其獻館其使者

十六年順甯死子托歡嗣封復奉貢

宣德九年托歡襲殺阿嚕台未幾內殺其賢義安樂兩王
欲自稱汗而眾不附乃求元後托克托布哈舊作脫不花立之
自爲丞相居漠北凡蒙古諸部俱屬焉

正統四年托歡死額森嗣稱太師眾益強托克托布哈不
能制每入貢主臣並使朝廷亦兩敕答之

十四年額森脅諸番分道大舉入寇明師覆於土木英宗
北狩

景泰二年額森弑其主自立以其次子爲太師東自烏梁
海西至赤斤蒙古哈密皆受約束額森入貢自稱田盛大
可汗帝詔稱爲衛喇特汗

五年知院阿拉舊作阿刺攻額森殺之未幾韃靼別部保喇舊作
來者復殺阿拉求托克托布哈子穆爾格爾舊作麻兒立之
號小王子自是衛喇特遽衰額森諸子窮依哈密部眾分
散嘉靖以後爲哈密土魯番所隔其承襲代次無可考

于闐

于闐漢時通焉都葱嶺之北西域諸國葱嶺以南賽瑪爾
堪舊作撒馬兒罕最大其北則于闐最大東有白玉河西有綠玉
河又西有黑玉河源皆出崑崙山土人夜視月光盛處入
水探之必得美玉

永樂閒屢遣使入貢成祖欲遠方萬國無不臣服故西域

之使歲歲不絕諸番貪中國財貨且利市易絡繹道途東西數千里閒騷然煩費仁宗初給事中黃驥極陳其害自是不復使西域貢使亦漸稀迄萬厯時于闐猶閒入貢

賽瑪爾堪

舊作撒馬兒罕

賽瑪爾堪卽漢罽賓至肅州九千里民居稠密西南諸番之貨皆聚於此

洪武中太祖欲通西域屢遣使招諭而遐方君長未有至

者二十年賽瑪爾堪王特穆爾首遣回回瑪拉噶

舊作滿刺哈

富寶

舊作非思

等來朝貢自是頻歲貢馬駝一歲再至貢馬以

千計

永樂後或比年或閒歲或三年輒入貢皆有賞給

嘉靖十二年偕天方土魯番入貢稱王者至百餘人禮官
夏言等謂西域稱王者止土魯番天方賽瑪爾堪如日落
諸國稱名雖多朝貢絕少今土魯番十五王天方二十七
王賽瑪爾堪五十三王實前此未有宏治時回賜敕書止
稱一王若循賽瑪爾堪往歲故事類答王號人與一敕非
所以尊中國制外蕃也帝納其言國止給一敕且加詰讓
示以國無二王之義然諸番迄不從十五年入貢復如故
甘肅巡撫趙載奏諸國稱王者至一百五十餘人皆非本
朝封爵宜令改正且定貢使名數通事宜用漢人毋專用

色目人致交通生鬻部議從之後入貢迄萬厯中不絕

布噶爾

舊作卜花兒

布噶爾在賽瑪爾堪西北七百餘里永樂十三年陳誠自西域還所經哈喇等凡十七國悉詳其山川人物風俗爲使西域記以獻宣德七年命李達撫諭西域布哈爾皆與焉

沙喇斯

舊作失刺思

沙喇斯近賽瑪爾堪永樂中遣使偕哈喇等八國入貢命李達等偕其使往勞之自後每偕他國來悉與厚賜

嘉靖三年與旁近三十二部俱貢馬方物從使者所乞量

與蟒衣膝襴磁器布帛自後貢使不至

哈魯

舊作黑婁

布達實克

附舊作把丹沙

哈魯近賽瑪爾堪世爲婚姻其地山川草木禽獸皆黑男女亦然宣德七年遣使來朝貢方物

景泰四年偕鄰境三十一部來貢馬駝及玉石等物成化十九年與沙喇斯賽瑪爾堪來貢

又有布達實克景泰閒嘗入貢至是亦遣使與哈魯偕至宏治三年又與天方諸國貢駝馬玉石

實喇哈雅

舊作沙鹿海牙

實喇哈雅西去賽瑪爾堪五百餘里永樂閒李達陳誠使

其地其酋卽遣使奉貢宣德七年命中官李貴齎敕諭其酋賜金織文綺綵幣

默色爾

舊作米昔兒

默色爾亦名密思兒永樂中遣使朝貢旣宴賚命五日一給酒饌果餌所經地皆置宴正統六年王鎖魯檀阿失刺福復來貢禮官言其地過遠未有賜例昔賽瑪爾堪初貢時賜予過優今宜稍損從之自後不復至

哈喇

舊作哈烈

哈喇一名黑魯在賽瑪爾堪西南三千里去嘉峪關萬二千餘里西域大國也洪武時屢遣使招諭不至

永樂六年遣傅安齎書幣往哈喇其酋遣使隨安朝貢賽瑪爾堪酋哈里者哈喇酋兄子也二人不相能數構兵帝因其使臣還命都指揮白阿兒忻台齎敕諭以一家之親恩愛相厚足制外侮自今宜休兵息民保全骨肉共享太平之福并敕諭哈里罷兵俱賜綵幣白阿兒忻台既奉使徧詣賽瑪爾堪諸國諭令入朝諸酋長咸喜各遣使偕哈喇使臣貢獅子西馬文豹諸物十一年達京師帝喜御殿受之犒賜有加自是諸國使並至皆序哈喇於首十三年哈喇諸國復遣使偕來貢文豹西馬及他方物明年再貢及還命陳誠齎書幣報之所過州縣皆宴餞

嘉靖二十六年甘肅巡撫楊博言西域入貢人多宜爲限制禮官言祖宗故事惟哈密每年入貢貢三百人送十一赴京餘留關內有司供給他若哈喇哈三土魯番天方賽瑪爾堪諸國道經哈密者或三年五年一貢止送三五十人其存留賞賚如哈密例宜敕邊臣怡遵此例制可

西北

伊里巴拉

伊里巴拉

舊作亦力把力

巴什伯里在肅州西北三千餘里洪

武二十四年國王哈達拉和卓

舊作黑的兒火者

使貢馬賜其王

綵幣十表裏其使者皆有賜

永樂四年貢璞玉

十六年布色

舊作歪思

弒其從兄王諾果沙扎該

舊作納黑失只罕

自

立爲王徙其部落西去更號伊里巴拉宣德後屢入貢
成化元年禮官定西域朝貢期令伊里巴拉三歲五歲一
貢使者不得過十人自是朝貢遂稀

正北

韃靼

通典所載北邊惟韃靼朵顏三衛與明
通東北諸部落皆斷自遼金後無可考

韃靼卽蒙古故元後也明初元順帝殂於應昌其子阿裕
實哩達喇

舊作愛猷識里達臘

嗣立徙於和甯傳其次子特古斯特

穆爾

舊作脫古思帖木兒

駐捕魚兒海洪武二十一年爲明將藍玉

所敗走至圖拉河

舊作土刺河

爲其下伊蘇岱爾

舊作也速迭兒

所弑

部落多潰其族烏納實哩收散亡居和甯之西復爲明都

督劉眞等所破自特古斯特穆爾後五傳至昆特穆爾

舊作

坤帖木兒

皆被殺遠族果勒齊

舊作鬼力赤

篡位稱汗始去國號稱

韃靼

永樂六年知院阿魯台以果勒齊非元裔殺之而迎元後

布尼雅實哩

舊作木里失里

立以爲汗成祖以書諭之不報命洪

國公邱福統五將軍出塞擊之師殲焉

八年帝親征布尼雅實哩懼欲與阿魯台俱西阿魯台不

從君臣始各自爲部布尼雅實哩西奔阿魯台東奔明師
追敗之於鄂諾河舊作幹
難河還師遇阿魯台復破之

十年布尼雅實哩爲衛喇特瑪哈穆特舊作馬
哈木所殺

十一年阿魯台遣使來告願輸誠內附爲故主復仇請發
兵討賊帝義之封爲和甯王自是歲或入貢或再貢以爲
常

十四年阿魯台敗衛拉特來獻捷賜賚有差

二十年阿魯台大入興和帝詔親征阿魯台大懼於是棄
其輜重以其孥北徙

洪熙元年阿魯台以數敗於衛拉特乃率其屬東走烏梁

海駐牧遼塞

宣德九年呵嚕台爲元裔托克托布哈舊作脫所襲孛畜

略盡阿嚕台與其子碩尼堪舊作失徙居穆納山舊作毋

未幾衛喇特順甯王托歡襲殺阿嚕台而立托克托布哈

爲汗以呵嚕台之眾屬之托歡自爲丞相

正統四年托歡死子額森舊作也嗣益桀驁自雄托克托布

哈不能制每入貢主臣並使朝廷亦兩敕答之

景泰三年額森疑其主托克托布哈與中國通攻殺之額

森自爲汗五年爲其下阿拉所殺部中求托克托布哈之

子穆爾格爾舊作麻兒可兒立之號小王子是時韃靼諸部多互

相雄長至天順閒有阿勒楚爾舊作阿羅出者率屬潛居河套逼近西邊其後相繼稱小王子者屢往來套中出沒爲寇迄成化宏治無甯歲

嘉靖時諸部落在西北邊者曰濟農舊作吉囊曰諳達舊作俺答據

河套爲諸部長濟農死諳達獨盛歲數擾延綏諸邊

二十九年諳達大舉犯京師議開馬市而入寇如故遂罷之

隆慶四年諳達孫巴噶奈濟舊作把漢那吉內附詔授指揮使明

年封順義王名所居城曰歸化由是西塞諸部歲來貢市

不用兵革者二十餘載

萬厯後邊事愈棘朝議愈紛諸部長恃其暴橫迭出與中夏抗其禍蓋與明相終始云

烏梁海

舊作兀良哈

烏梁海在黑龍江南漁陽塞北洪武初相率內附遂置大甯都司營州諸衛封子權爲甯王鎮焉數爲韃靼所抄二十年詔分烏梁海之地置三衛指揮使司各領其眾以爲聲援自大甯前抵喜峯口近宣府曰朵顏自錦義厯廣甯至遼河曰泰甯自黃泥窪踰瀋陽鐵嶺接開原曰福餘惟朵顏地最險而強

成祖自燕起兵患甯王躡其後因厚賂三衛說之來旣誘

執甯王乃選烏梁海三千人爲奇兵從戰

永樂元年徙甯王於南昌徙都司於保定而盡割大甯地
畀三衛以償前勞

未幾三衛復叛附阿嚕台二十年帝親征阿嚕台還擊之

大敗其眾於奇拉爾河

舊作屈烈河

宣德三年烏梁海入塞帝率諸將出喜峯口敗之於寬河
六年遣使撫諭聽其來朝及往來市易

正統閒附衛拉特爲之耳目雖歲來致貢止以利中國賜
賚十四年導衛拉特大入英宗遂以是役北狩

景泰初遣使撫諭三衛受額森旨不敢背數以非時入貢

稽察中國舊制三衛每歲三貢其貢使俱從喜封口驗入
有急報則許進永平時三衛使有自獨石及萬全右衛來
者邊臣以爲言敕止之

大順以後陽順陰逆屢肆侵盜至萬厯初朵顏長安

舊作長昂

益強挾賞不遂數糾眾入掠截諸番貢道官軍禦之殺傷

相當二十九年長安與董呼哩

舊作董孤裡

等皆納款請復甯

前木市許之長安死諸子稍衰三衛皆靖

明會要卷八十終